



UNIVERSITAS STUDIORUM VILNENSIS BATHOREANA
UNIVERSITATIBUS STUDIORUM
ACADEMIIS ATHENAEIS GYMNASIIS

S. P. D.

¶ STEPHANUS BATHORY POLONIAE REX rerum civilium et militarium peritissimus, omni liberali doctrina politissimus, anno MDLXXIX bello immani saeviente Studium Generale Vilnae condidit, quod placidae pacis monumentum perenne esset atque rudes incultasque gentes quae Orientis partes incolunt ad humanitatem informaret, litteris, disciplinis, artibus liberalibus institueret.

¶ Quam spem cogitationum et consiliorum regii conditoris Academia nostra numquam fefellit.

¶ Universitas Vilnensis Bathoreana a Cracoviensi, Prahensi, Vindobonensi Academiis itineribus iuncta, inter Pontum Euxinum Caspiumque mare, Album pelagus atque Siberiam nive perenni obrutam in media solitudine collocata et constituta, delectis cooptatisque in magistrorum nostris viris praestantissimis, ut Skarga, Smiglecki, Łęczycki, Sarbiewski, Poczobut, Lelewel, Sniadecki par nobile fratrum, adgregatis eruditissimis Britannis, Gallis, Italis, Germanis, ut Bosgrave, Gilibert, Sartoris, Cappelli, Forster, Croddeck, Frank, cultum atque humanitatem agrestibus regionibus trans Dunam et Borysthenem intulit, easdem doctrina et eruditione conlustravit, adulescentes nostros atque externos disciplinis erudit, artibus liberalibus ornavit, ad virtutem adrexit doctumque alta cupere, alta sperare atque viros ingeniis magnis excellentes Adamum Mickiewicz et Iulium Slowacki poetas illos et vates, I. I. Kraszewski celeberrimum scriptorem tulit.

¶ Universitas nostra hostili manu anno MDCCCXXXII deleta atque interempta, Polonia restituta, anno MCMXIX a Iosepho Piłsudski instaurata abhinc annos decem in opimo solo doctrinas disciplinasque atque artes liberales iuvenili animi ardore scriit atque colit.

¶ Itaque LXX lustris exactis inclutorum decessorum nostrorum et eruditi temporis acti hoc anno a. d. VI Idus Octobres sollempni celebratione memoriam repetere constituimus.

¶ Cum omnium terrarum homines litterati conlegae sint et quasi amici, de sollempnitate nostra Vos, Viri clarissimi atque doctissimi, certiores facimus. Vale te.

Nostra Senatusque voluntate et iudicio
dedimus a. d. VIII Kalendas Iulias MCMXXIX.

L. Falkowski

Rector

